

ZAKON O UDRUŽENJIMA I FONDACIJAMA BOSNE I HERCEGOVINE

("Sl. glasnik BiH", br. 32/2001, 42/2003, 63/2008, 76/2011 i 94/2016)

PRVI DIO I UDRUŽENJA I FONDACIJE

I.1. OPŠTE ODREDBE

Član 1

1. Ovim zakonom uređuju se osnivanje, organi i pravni položaj udruženja i fondacija, registracija, imovina, prestanak rada i brisanje iz Registra, statusne promjene i druga pitanja značajna za rad udruženja i fondacija koji izaberu da se registruju u skladu sa ovim zakonom na nivou Bosne i Hercegovine.
2. Ovim zakonom uređuje se i registracija kancelarija, predstavništava ili drugih organizacionih oblika stranih ili međunarodnih udruženja ili fondacija koje izaberu da se registruju u skladu sa ovim zakonom na nivou Bosne i Hercegovine.
3. Odredbe ovog zakona primjenjuju se i na registraciju sportskih saveza Bosne i Hercegovine, ako drugim zakonom nije drugačije propisano.

Član 2

1. Udruženje, u smislu ovog zakona, jeste svaki oblik dobrovoljnog povezivanja tri ili više fizičkih ili pravnih lica, u svim kombinacijama, radi unapređenja i ostvarivanja nekog zajedničkog ili opšteg interesa ili cilja, u skladu sa Ustavom i zakonom, a čija svrha nije sticanje dobiti.
2. Udruženja mogu osnivati svoje saveze ili druge oblike udruživanja u kojima se njihovi interesi povezuju na višem nivou (udruženja višeg nivoa), ako posebnim zakonom nije drugačije propisano.
3. Udruženja višeg nivoa uživaju sva prava i slobode garantovane udruženjima.
4. Udruženja i udruženja višeg nivoa imaju pravo slobodno se udruživati te sarađivati sa međunarodnim organizacijama osnovanim radi unapređenja istih prava i interesa.
5. Fondacija je pravno lice koje nema svoje članstvo, a čiji je cilj upravljanje određenom imovinom u opštem interesu ili u dobrotvorne svrhe. Fondacija postoje pravnim licem onda kada je registrovana onako kako je to predviđeno ovim zakonom.

Član 3

1. Fizička lica koja su državljani Bosne i Hercegovine i stranci koji imaju boravište u Bosni i Hercegovini i pravna lica koja su u Bosni i Hercegovini registrovana, slobodno i dobrovoljno osnivaju udruženja ili fondacije u skladu sa Ustavom i zakonima Bosne i Hercegovine.
2. Udruženja i fondacije imaju slobodu djelovanja na cijelom području Bosne i Hercegovine, bez obzira gdje je sjedište subjekta upisa.

Član 4

1. Udruženje, odnosno fondacija može obavljati privredne jelatnosti samo ako je osnovna svrha takvih jelatnosti ostvarivanje ciljeva utvrđenih statutom.
2. Udruženje ili fondacija mogu obavljati nesrodne privredne jelatnosti (privredne jelatnosti koje nisu neposredno povezane sa ostvarivanjem osnovnih statutarnih ciljeva udruženja i fondacija) samo preko posebno osnovanog pravnog lica.

3. Dobit koju udruženje ili fondacija ostvare iz nesrodnih privrednih djelatnosti može se upotrijebiti samo za ostvarivanje ciljeva koji se utvrde statutom.
4. Nije dozvoljeno direktno ili indirektno sticanje dobiti ili druge materijalne koristi ostvarene iz djelatnosti udruženja ili fondacije: osnivačima, članovima udruženja, članovima upravljačkih organa, odgovornim licima, radnicima ili donatorima.
5. Ograničenje iz prethodne tačke se ne odnosi na naknade za rad ili nadoknade troškova tim licima u vezi sa ostvarivanjem zakonitih ciljeva i aktivnosti utvrđenih statutom udruženja ili fondacije.
6. Ograničenja iz ovog člana neće uticati na imovinu udruženja i fondacije iz člana 46. ovog zakona.

Član 5

1. Udruženja i fondacije samostalno utvrđuju ciljeve i djelatnosti u skladu sa Ustavom i zakonom.
2. Ciljevi i djelatnosti udruženja i fondacija ne mogu biti usmjereni na rušenje ustavnog poretka Bosne i Hercegovine, kršenje zagarantovanih ljudskih prava ili izazivanje i podsticanje neravnopravnosti, mržnje i netrpeljivosti zasnovane na rasnoj, nacionalnoj, vjerskoj ili drugoj pripadnosti ili opredjeljenju.
3. Ciljevi i djelatnosti registrovanog udruženja odnosno fondacije ne mogu uključivati angažovanje u predizbornoj kampanji, prikupljanje sredstava za kandidate ili finansiranje kandidata odnosno političkih partija.
4. Udruženje i fondacija podnose godišnji izvještaj o radu i finansijski izvještaj u skladu sa zakonom, drugim propisima i statutom.
5. Finansijski izvještaj iz stava (4) ovog člana, udruženje i fondacija dužni su dostaviti nadležnom organu prema sjedištu udruženja ili fondacije i Ministarstvu pravde Bosne i Hercegovine radi objave na veb-stranici Ministarstva, a najkasnije do 30. aprila tekuće godine za prethodnu poslovnu godinu.

Član 6

Rad registrovanog udruženja ili fondacije je javan i transparentan.

Član 7

1. Svako registrovano udruženje ili fondacija imaju svoj puni naziv i sjedište.
2. Udruženje ili fondacija u obavljanju svoje djelatnosti mogu upotrebljavati isključivo svoj registrovani naziv.
3. Naziv registrovanih udruženja ili fondacije mora biti na tri službena jezika i dva pisma koji su u upotrebi u Bosni i Hercegovini.
4. Uz svoj puni naziv, udruženje i fondacija može, ako je predviđeno statutom, koristiti i skraćeni naziv koji mora biti na tri jezika i dva pisma koji su u upotrebi u Bosni i Hercegovini, a koji mora sadržavati karakteristični dio punog naziva udruženja ili fondacije.
5. Naziv udruženja ili fondacije može biti na stranom jeziku, koji u tom slučaju mora biti pisan latiničnim ili ćiriličnim pismom.
6. U naziv udruženja ili fondacije može se unijeti ime ili dio imena nekog fizičkog lica, uz njegovu saglasnost, a ako je to lice umrlo, uz saglasnost nasljednika. U naziv udruženja ili fondacije može se unijeti ime ili dio imena neke istorijske ili značajne ličnosti, uz njenu saglasnost, a ako je ta osoba umrla, samo ako se ime koristi na prikladan način i uz saglasnost nasljednika, ako ih ima.
7. U slučaju da je naziv udruženja ili fondacije na stranom jeziku, u skladu sa stavom (5) ovog člana, u Registar se upisuje službeni prevod naziva na jezicima u službenoj upotrebi u Bosni i Hercegovini.
8. Udruženje odnosno fondacija mogu imati svoj znak.
9. Naziv, skraćeni naziv i znak udruženja ili fondacije moraju se jasno razlikovati od naziva i znaka drugih registrovanih udruženja ili fondacija.

Član 7a

Izrazi napisani samo u jednom rodu odnose se podjednako na muški i ženski rod.

Član 8

1. Udruženje ili fondacija upisuje se u registar udruženja ili registar fondacija koji vodi Ministarstvo pravde Bosne i Hercegovine (u daljnjem tekstu: Ministarstvo).
2. Postupak za registraciju, upis izmjena i dopuna registracije i prestanak rada udruženja i fondacija vodi se po odredbama ovog zakona i Zakona o upravnom postupku.
3. Udruženja i fondacije status pravnog lica stiču danom registracije.

I.2. UDRUŽENJA

I.2.1. Osnivanje udruženja

Član 9

1. Udruženje mogu osnovati najmanje tri osnivača. Osnivači udruženja mogu biti fizička lica koja su državljani Bosne i Hercegovine i stranci koji u Bosni i Hercegovini imaju boravište ili pravna lica koja su u Bosni i Hercegovini registrovana. Udruženje mogu osnovati međusobno fizička i pravna lica, ali broj osnivača ne može biti manji od tri.
2. Za osnivanje udruženja koje ispunjavaju uslove za registraciju obavezno je donošenje osnivačkog akta.
3. Radnje preduzete u vremenu između osnivanja i registracije udruženja mogu stvoriti obaveze samo za one koji su preduzeli te radnje.
4. Smatra se da je udruženje osnovano na neodređeno vrijeme, osim ako posebnim zakonom, osnivačkim aktom i statutom nije utvrđeno drugačije.

Član 10

1. Da bi udruženje steklo uslove za registraciju, osnivačka skupština udruženja ima obavezu da donese osnivački akt, statut udruženja i imenuje organe upravljanja u skladu sa ovim zakonom.

Član 11

1. Osnivački akt udruženja sadrži:
 - a) imena i prezimena, odnosno nazive osnivača i njihova prebivališta, odnosno sjedišta;
 - b) naziv udruženja;
 - c) sjedište i adresu udruženja;
 - d) ciljeve i djelatnosti udruženja;
 - e) ime i prezime i adresu lica ovlaštenog za obavljanje poslova upisa u Registar;
 - f) ime, prezime i potpise osnivača;
 - g) broj i datum osnivačkog akta.
2. Kada je osnivač udruženja pravno lice, osnivački akt udruženja potpisuje njegov zastupnik, tako što uz puni naziv pravnog lica dodaje svoj potpis i pečat pravnog lica.

Član 12

Statut udruženja sadrži:

- a) naziv udruženja, skraćeni naziv ukoliko postoji, i adresu udruženja
- b) ciljevi i djelatnosti udruženja
- c) postupak za primanje i isključivanje članova
- d) organe udruženja, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove skupštinu, uslovi i način raspuštanja odnosno prestanka rada
- e) pravila za ostvarivanje, korištenje i raspolaganje sredstvima udruženja, kao i organ koji je ovlašten za nadzor nad korištenjem tih sredstava
- e1) način podnošenja finansijskog izvještaja i izvještaja o radu
- f) javnost rada
- g) postupak za izmjenu i dopunu statuta, ovlaštenje i način donošenja drugih opštih akata
- h) opis oblika i sadržaj pečata i znaka udruženja;.

i) zastupanje udruženja

j) uslove i postupak za spajanje, podjela odnosno prestanka rada udruženja, uključujući i bilo kakav poseban kvorum ili pravila za postizanje kvalifikovane većine u postupku glasanja i

k) postupak za raspologanje preostalim imovinom ili drugim sredstvima u slučaju raspuštanja ili prestanka rada udruženja.

Član 13

1. Udruženje koje je upisano u Registar može sprovesti programe i projekte od javnog interesa.

2. Programima ili projektima od javnog interesa koje donose institucije Bosne i Hercegovine smatraju se zaokružene i tematski jasno određene aktivnosti čije sprovođenje dugoročno ili u ograničenom roku djelovanja daje prepoznatljivu dodatnu društvenu vrijednost kojom se podiže kvalitet života pojedinaca, odnosno unapređuje razvoj društvene zajednice.

3. Institucije Bosne i Hercegovine na osnovu sprovedenog javnog poziva, odnosno konkursa, zaključuju ugovore sa udruženjima o sprovođenju programa ili projekata od javnog interesa.

4. Aktivnostima od javnog interesa udruženja smatraju se posebno aktivnosti udruženja koje doprinose promociji ljudskih prava, prava osoba sa invaliditetom, zaštite djece sa teškoćama u razvoju, prava nacionalnih manjina, jednakosti i ravnopravnosti u borbi protiv diskriminacije, zaštite od nasilja, aktivnosti djece i mladih, borbe protiv različitih oblika zavisnosti, razvijanja volonterizma, humanitarnih aktivnosti, socijalne zaštite, zaštite životne sredine, zaštite prirode, zaštite zdravlja ljudi, umjetnosti, obrazovanja, kulture i svih drugih aktivnosti koje se po svojoj prirodi mogu smatrati djelovanjem od javnog interesa.

5. Udruženje koje je dobilo sredstva za sprovođenje programa ili projekata od javnog interesa podnosi izvještaj davaocu tih sredstava i informiše javnost putem svoje veb-stranice.

6. Udruženje koje je dobilo sredstva za sprovođenje programa ili projekata od javnog interesa u sprovođenju programa ili projekata može ostvariti poreske, carinske i druge olakšice, u skladu sa posebnim propisima.

7. Savjet ministara Bosne i Hercegovine će, na prijedlog Ministarstva, donijeti podzakonski akt kojim će se urediti kriterijumi za izradu i sprovođenje programa i projekata od javnog interesa koje mogu sprovesti udruženja.

Član 14

1. Registrovano udruženje može se spojiti ili podijeliti u drugo udruženje.

2. Spajanje je osnivanje novog udruženja na koje prelazi cjelokupna imovina tri ili više udruženja koja se spajaju. Udruženja prestaju da postoje spajanjem, a na postupak upisa novonastalog udruženja primjenjuju se odredbe ovog zakona koje se odnose na osnivanje udruženja.

3. Udruženje se može podijeliti na dva ili više udruženja. Podijeljeno udruženje prestaje da postoji, a na postupak upisa novonastalih udruženja primjenjuju se odredbe ovog zakona koje se odnose na osnivanje udruženja.

4. Udruženje može osnovati svoje kancelarije, predstavništva i podružnice u skladu sa odredbama statuta.

I.2.2. Članstvo

Član 15

1. Udruženje može ustanoviti svoje kriterije za prijem u članstvo. Kriteriji za prijem u članstvo podliježu samo ograničenjima u smislu zabrane diskriminacije koja je utvrđena u Ustavu i zakonima Bosne i Hercegovine.

2. Udruženje je dužno da vodi spisak svojih članova. Popis članova udruženja vodi se elektronski ili na drugi odgovarajući način i sadrži:

a) ime, prezime, odnosno naziv člana, s adresom prebivališta, odnosno sjedišta;

b) datum pristupanja i broj pristupnice udruženja;

c) vrstu članstva udruženja, u skladu sa statutom;

- d) datum prestanka članstva u udruženju.
3. Popis članova udruženja mora biti dostupan na uvid nadležnim organima na njihov zahtjev.
4. Svaki član udruženja može da pokrene postupak pred nadležnim sudom za utvrđivanje ništavosti opšteg akta udruženja koji je donesen suprotno odredbama statuta ili drugog opšteg akta udruženja, a najkasnije u roku od šest mjeseci od dana donošenja tog akta.

I.2.3. Organi udruženja

Član 16

1. Skupština je obavezni organ udruženja.
2. Ako statutom nije drugačije uređeno, skupštinu čine svi članovi udruženja, sa jednakim pravom glasa.
3. Statutom udruženja mogu se predvidjeti i drugi organi.
4. Ukoliko statutom nije predviđeno osnivanje upravnog odbora ili drugog organa upravljanja, skupština će imenovati jedno ili više lica koja će zastupati udruženje u pravnom prometu.

Član 17

1. Za strano ili međunarodno udruženje dovoljno je da ima akte, bez obzira koako su nazvani, i organe, koji ispunjavaju funkcije kako ih definiše ovaj zakon.

Član 18

1. Skupština, kao najviši organ udruženja je nadležna za:
 - a) donošenje statuta, izmjena i dopuna statuta i drugih akata određenih statutom
 - b) odlučivanje o spajanju, podjeli i prestanku rada, osnivanju drugih pravnih lica, kao i drugim statusnim promjenama udruženja
 - c) razrješenje članova upravnog odbora, ako takav organ udruženja postoji
 - d) usvajanje izvještaja koje je pripremio upravni odbor, ako takav organ udruženja postoji i
 - e) odlučivanje o svim drugim pitanjima koja nisu u nadležnosti drugih organa udruženja.

Član 19

1. Upravni odbor, ili lice ovlašćeno za zastupanje:
 - a) priprema sjednice skupštine
 - b) priprema nacrt statuta i drugih akata koje donosi skupština
 - c) provodi politiku, zaključke i druge odluke koje je donijela skupština
 - d) upravlja imovinom udruženja
 - e) podnosi godišnji ili periodični izvještaj o svom radu skupštini na usvajanje i
 - f) vrši i druge poslove određene statutom.

Član 20

(brisan)

I.3. FONDACIJE

I.3.1. Osnivanje fondacija

Član 21

1. Fondacija koja je upisana u Registar može realizovati programe i projekte od javnog interesa.
2. Programima ili projektima od javnog interesa smatraju se zaokružene i tematski jasno određene aktivnosti čije sprovođenje kroz dugoročni ili vremenski ograničeni rok djelovanja daju prepoznatljivu dodatnu društvenu vrijednost kojom se podiže kvalitet života pojedinaca, odnosno unapređuje razvoj društvene zajednice.

1) Aktivnostima od javnog interesa fondacija smatraju se posebno aktivnosti fondacije koje doprinose promociji: ljudskih prava, prava osoba sa invaliditetom, zaštite djece sa teškoćama u razvoju, prava nacionalnih manjina, jednakosti i ravnopravnosti u borbi protiv diskriminacije, zaštite od nasilja, aktivnosti djece i mladih, borbe protiv različitih oblika zavisnosti, razvijanja volonterstva, humanitarnih aktivnosti, socijalne zaštite, zaštite životne sredine, zaštite prirode, zaštite zdravlja ljudi, umjetnosti, obrazovanja, kulture i svih drugih aktivnosti koje se po svojoj prirodi mogu smatrati djelovanjem od javnog interesa.

3. Institucije Bosne i Hercegovine na osnovu sprovedenog javnog poziva, odnosno konkursa, zaključuju ugovore sa fondacijama o sprovođenju programa ili projekata od javnog interesa.

4. Fondacija koja je dobila sredstva za sprovođenje programa ili projekata iz stava (2) ovog člana podnosi izvještaj davaocu sredstava i informiše javnost putem svoje veb-stranice. Fondacija koja je dobila sredstva za sprovođenje programa ili projekata iz stava (2) ovog člana, u sprovođenju programa ili projekata može ostvariti poreske, carinske i druge olakšice u skladu sa posebnim propisima.

5. Savjet ministara Bosne i Hercegovine će, na prijedlog Ministarstva, donijeti podzakonski akt kojim će se urediti kriterijumi za izradu i sprovođenje programa i projekata od javnog interesa koje mogu sprovoditi fondacije.

6. Registrovana fondacija može se spojiti ili podijeliti u drugu fondaciju. Spajanje je osnivanje nove fondacije na koju prelazi cjelokupna imovina fondacija koje se spajaju. Fondacija spajanjem prestaje da postoji, a na postupak spajanja fondacija primjenjuju se odredbe ovog zakona o osnivanju fondacija. Fondacija se može podijeliti na dvije ili više fondacija. Podijeljena fondacija prestaje da postoji, a na postupak upisa novonastalih fondacija primjenjuju se odredbe ovog zakona o osnivanju fondacija.

7. Fondacija može osnovati svoje kancelarije, predstavništva i filijale u skladu sa odredbama statuta.

Član 22

1. Fondaciju može osnovati jedno ili više fizičkih ili pravnih lica (u daljem tekstu: osnivači), s tim da udruženje mogu osnovati međusobno fizička i pravna lica. Osnivači ne moraju biti državljanini ili pravna lica iz Bosne i Hercegovine.

2. Fondacija može biti osnovana jednostranom izjavom volje, ugovorom, testamentom, legatom ili drugim odgovarajućim pravnim aktom koji mora da sadrži podatke potrebne za osnivanje i upis fondacije u registar.

3. Fondacija mora imati osnivački akt, statut, upravni odbor, odnosno akte i organe, koji su im suštinski ekvivalentni. Za stranu ili međunarodnu fondaciju dovoljno je da ima akte, bez obzira kako su nazvani i organe, koji vrše funkcije kako ih definiše ovaj zakon.

Član 23

1. Osnivački akt fondacije sadrži:

a) ime i prezime, odnosno naziv osnivača i njegovo prebivalište, odnosno sjedište;

b) naziv fondacije;

c) sjedište i adresu fondacije;

d) ciljeve i djelatnosti fondacije;

e) iznos novčanih sredstava ili drugih vidova imovine koju osnivač ulaže, a koji ne može biti manji od dvije hiljade konvertibilnih maraka;

f) ime i prezime i adresu lica ovlašćenog za obavljanje poslova upisa u Registar;

g) ime, prezime i potpis osnivača;

h) broj i datum osnivačkog akta.

2. Kada je osnivač fondacije pravno lice, osnivački akt fondacije potpisuje njen zastupnik, tako što uz puni naziv pravnog lica dodaje svoj potpis i pečat pravnog lica.

Član 24

Statut fondacije sadrži:

- a) naziv, skraćeni naziv ukoliko postoji i sjedište fondacije
- b) ciljeve i djelatnosti fondacije
- c) organi fondacije, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove upravni odbor, uslovi i način raspuštanja, odnosno prestanak rada
- d) pravila upravljanja i korištenja imovine fondacije
- d1) moguće korisnike sredstava fondacije
- e) postupci za izmjenu i dopunu statuta, kao i ovlaštenje i postupci donošenja ostalih opštih akata
- f) uslovi i postupak za spajanje i podjelu ili prestanak rada fondacije, uključujući sva pravila glasanja za koje je potreban poseban kvorum ili kvalifikovana većina
- g) kriteriji za raspolaganje imovinom fondacije u slučaju prestanka rada fondacije i
- h) opis oblika i sadržaj pečata i znaka fondacije.

I.3.2. Organi fondacije

Član 25

1. Organ upravljanja fondacijom je upravni odbor.
2. Statutom registrovane fondacije se mogu utvrditi i drugi organi fondacije.

Član 26

1. Upravni odbor registrovane fondacije je odgovoran za ostvarivanje ciljeva i djelatnosti fondacije, a može obavljati i druge poslove utvrđene statutom i u skladu sa zakonom.
2. Upravni odbor registrovane fondacije čine najmanje tri člana.
3. Član upravnog odbora fondacije može biti državljanin Bosne i Hercegovine, kao i stranac u skladu sa Zakonom o kretanju i boravku stranaca i azilu.
4. Član upravnog odbora ne može biti: maloljetno lice, lice zaposleno u fondaciji, te član drugih organa fondacije.
5. Upravni odbor fondacije nadležan je za:
 - a) donošenje statuta, izmjena i dopuna statuta i drugih akata utvrđenih statutom
 - b) upravljanje imovinom fondacije
 - c) imenovanje lica ovlaštenog za zastupanje i predstavljanje fondacije
 - d) odlučivanje o spajanju, podjeli i prestanku rada, kao i o drugim statusnim promjenama fondacije
 - e) pripremanje finansijskih i drugih izvještaja; i
 - f) odlučivanje o svim drugim pitanjima koja nisu u nadležnosti drugih organa fondacije.

Član 27

(brisano)

I.4. REGISTROVANJE UDRUŽENJA I FONDACIJA

Član 28

1. Podnošenje zahtjeva za registraciju udruženja i fondacija je dobrovoljno.
2. Ministarstvo vodi registar udruženja i fondacija, u skladu sa odredbama ovog zakona.
3. Registar udruženja i fondacija vodi se i u elektronskoj formi, za udruženja i fondacije upisane u registar kod ministarstva.
4. Registar je otvoren za javnost. Svako lice može lično ili putem pošte zatražiti kopiju bilo kojeg upisa u registar ili bilo kojeg dokumenta iz spisa, u skladu sa odredbama Zakona o slobodi pristupa informacijama u Bosni i Hercegovini.
5. Izuzetno od odredaba stava 4. ovog člana, ovlašćeni predstavnik udruženja ili fondacije može zahtijevati od Ministarstva da određeni podaci koji su upisani u registar ne budu dostupni javnosti,

ukoliko bi time mogao ugroziti lični integritet osnivača ili članova udruženja ili fondacije. O ovom zahtjevu Ministarstvo odlučuje posebnim rješenjem.

6. Izuzetno od odredaba stava (5) ovog člana, kopije ličnih dokumenata (lična karta, pasoš i sl.) osnivača i članova organa udruženja ili fondacije nisu dostupne javnosti.

Član 29

(brisano)

Član 30

1. Uslučaju da se dva ili više udruženja ili fondacije registruju sa suštinski istim nazivom ili znakom, Ministarstvo će, po zahtjevu stranke ili po službenoj dužnosti, donijeti rješenje kojim nalaže udruženju ili fondaciji koja je kasnije registrovana da:

a) u roku od trideset dana od dana prijema rješenja, podnese zahtjev za promjenu naziva, skraćenog naziva ili znaka u registru i

b) će, ukoliko ne podnese zahtjev u navedenom roku, biti brisana iz registra udruženja ili fondacija.

2. Rješenje iz stava 2. ovog člana dostavlja se zainteresovanim stranama.

3. Protiv rješenja iz stava 2. ovog člana ne može se uložiti žalba, ali se može pokrenuti upravni spor.

4. Ukoliko udruženje ili fondacija ne postupi po nalogu iz rješenja iz stava 2. ovog člana, Ministarstvo će donijeti rješenje o brisanju iz registra udruženja ili fondacija.

5. Protiv rješenja iz stava 5. ovog člana ne može se uložiti žalba, ali se može pokrenuti upravni spor.

Član 31

1. Zahtjev za upis u Registar udruženja ili fondacija podnosi lice ovlašćeno za podnošenje zahtjeva za upis u Registar, imenovano osnivačkim aktom udruženja ili fondacije i sadrži:

a) zapisnik sa osnivačke skupštine udruženja;

b) osnivački akt;

c) spisak osnivača;

d) ovjerene kopije ličnih karti ili pasoša osnivača ili izvod iz registra za osnivače pravna lica;

e) statut u dva primjerka;

f) izjavu kojom podnosilac zahtjeva pod punom moralnom, materijalnom i krivičnom odgovornošću izjavljuje da udruženje ili fondacija nije registrovano pod istim nazivom kod drugog registarskog organa u Bosni i Hercegovini;

g) odluku o imenovanju organa udruženja ili fondacije;

h) ime i prezime i adresu lica ovlašćenog za zastupanje udruženja ili fondacije;

i) primjerak znaka udruženja ili fondacije, ako postoji;

j) saglasnost iz člana 7. stav (6) ovog zakona;

k) dokaz iz člana 23. stav (1) tačke e), ako se radi o fondaciji;

l) druge dokaze u skladu sa statutom udruženja ili fondacije.

2. Obrazac i način podnošenja zahtjeva za registraciju utvrđuje se propisima Ministarstva.

Član 32

1. O prijemu zahtjeva za upis u registar ili zahtjeva za izmjenu i dopunu ili brisanje podataka u registru Ministarstvo izdaje potvrdu. Ministarstvo je dužno da donese rješenje u roku od 30 dana od dana podnošenja zahtjeva.

2. U slučaju kada je došlo do promjena činjenica koje se upisuju u registar, registrovano udruženje ili fondacija ne može preduzimati bilo koje radnje u pravnom prometu prije donošenja rješenja, odnosno upisa u registar činjenica koje se odnose na promjenu upisa.

Član 33

1. Rješenje o upisu udruženja ili fondacije sadrži:

- a) broj i datum;
 - b) registarski broj;
 - c) naziv i skraćeni naziv, ako postoji;
 - d) adresu sjedišta;
 - e) opis znaka udruženja ili fondacije, ako postoji;
 - f) ciljeve i djelatnosti;
 - g) imena i prezimena lica ovlaštenih za zastupanje udruženja ili fondacije u pravnom prometu;
 - h) sticanje svojstva pravnog lica.
2. Uz primjerak rješenja o upisu u registar udruženja ili fondacija Ministarstvo dostavlja primjerak ovjerenog statuta udruženja ili fondacije.

Član 34

1. Ako u toku postupka registracije Ministarstvo utvrdi, na osnovu zahtjeva i priloženih akata, da udruženje ili fondacija ne ispunjavaju uslove utvrđene ovim zakonom ili da zahtjev za registraciju nije potpun, na to će upozoriti podnosioca zahtjeva navodeći razloge zbog kojih registracija nije izvršena. Podnosiocu zahtjeva biće omogućeno da ispravi ili dopuni zahtjev u roku od 30 dana od dana prijema obavještenja. Ako podnosilac zahtjeva ne ukloni ove nedostatke u predviđenom roku, Ministarstvo će rješenjem odbaciti zahtjev za upis u registar.
2. Ako Ministarstvo ustanovi da su ciljevi i djelatnosti udruženja ili fondacije u suprotnosti sa odredbama člana 5. ovog zakona, Ministarstvo će rješenjem odbiti zahtjev za upis u registar, navodeći razloge za donošenje takvog rješenja.

Član 35

Rješenja iz čl. 33, 34, 43. stav 2, čl. 45. i 51. ovog zakona su konačna i protiv njih nije dozvoljena žalba, ali se može pokrenuti upravni spor pred Sudom Bosne i Hercegovine.

Čl. 36-42

(brisano)

Član 43

1. Udruženja i fondacije dužni su da Ministarstvu podnesu prijavu o svakoj promjeni činjenica koje se upisuju u registar, u roku od 30 dana od dana izvršene promjene.
2. Ministarstvo će donijeti rješenje o dozvoli promjena činjenica koje se upisuju u registar u skladu sa odredbama člana 32. ovog zakona.

Član 44

Rješenja o upisu u registar udruženja ili fondacija, rješenja o upisu promjena činjenica u registru, kao i rješenja kojim udruženja ili fondacije prestaju sa radom, objavljuju se u "Službenom glasniku BiH", o trošku podnosioca zahtjeva, i na internetskoj stranici Ministarstva.

Član 45

1. Odredbe zakona o registraciji udruženja i fondacija primjenjuju se i na registraciju kancelarija, predstavništava ili drugog organizacionog oblika stranog ili međunarodnog udruženja ili fondacije, ili druge međunarodne organizacije, ukoliko nije drugačije propisano zakonom (u daljnjem tekstu: strane nevladine organizacije).
2. Uz zahtjev za upis u registar prilaže se:
- a) dokaz o upisu strane nevladine organizacije u registar u domicilnoj zemlji;
 - b) akt o otvaranju kancelarija, predstavništva ili drugog organizacionog oblika u Bosni i Hercegovini;
 - c) ime i adresa lica ovlaštenog za zastupanje nevladine organizacije u Bosni i Hercegovini (ovjereni kopija isprave o identitetu lica ovlaštenog za zastupanje);
 - d) sjedište i adresa kancelarije u Bosni i Hercegovini.

3. Ako prema zakonu domicilne zemlje strane nevladine organizacije nije propisan upis udruženja u registar, umjesto rješenja o registraciji u domicilnoj zemlji, uz zahtjev za upis podnosi se druga pismena isprava, ovjerena od nadležnog organa, kojim se dokazuje da organizacija ima status pravnog lica u domicilnoj zemlji.

4. Ukoliko rješenje o upisu u registar u domicilnoj zemlji ne sadrži podatke o statutarnim ciljevima i djelatnostima udruženja, uz zahtjev za upis u registar podnosi se i statut ili neki drugi unutrašnji akt iz kojeg su vidljivi ciljevi strane nevladine organizacije.

I.5. IMOVINA UDRUŽENJA I FONDACIJA

Član 46

1. Prihodi udruženja i fondacija mogu uključivati sljedeće:

- a) članarina, kada je u pitanju udruženje
- b) dobrovoljne priloge i poklone javnih institucija, fizičkih i pravnih lica, kako stranih tako i domaćih, u gotovini, uslugama ili imovini bilo koje vrste
- c) državne subvencije i ugovore sa državom, javnim institucijama, fizičkim i pravnim licima, kako domaćim tako i stranim
- d) prihod od kamata, dividendi, dobiti od kapitala, zakupnina, honorara i sličnih izvora pasivnog prihoda i
- e) prihod stečen kroz ostvarivanje ciljeva i aktivnosti udruženja ili fondacije, kako je određeno statutom.

2. Ako su osnivači udruženja ili fondacije javno-pravni organi, oni ne mogu učestvovati u javnim konkursima sa svojim programima i projektima za dodjelu javnih sredstava, već se finansiraju iz drugih izvora, u skladu sa odredbama ovog zakona.

Član 47

1. Udruženja i fondacije dužni su voditi poslovne knjige i podnositi finansijske izvještaje u skladu sa propisima kojima se uređuje računovodstvo neprofitnih organizacija. Godišnji finansijski izvještaj udruženje i fondacija podnose skupštini, odnosno upravnom odboru, na način utvrđen statutom.

2. Finansijski izvještaj iz stava (1) ovog člana, udruženje ili fondacije dužni su čuvati najmanje pet godina, osim ako posebnim propisom nije utvrđeno duži period čuvanja.

3. Udruženje ili fondacija mora učiniti dostupnim javnosti sve informacije koje se tiču rada i djelovanja udruženja ili fondacije, u skladu sa pozitivnim zakonodavstvom.

4. Udruženje ili fondacija za svoje obaveze odgovara svojom cjelokupnom imovinom.

5. Nad imovinom udruženja ili fondacije može se sprovesti stečaj. Stečajni postupak sprovodi nadležan sud na čijem se području nalazi sjedište udruženja ili fondacije, u skladu sa posebnim zakonima.

6. Članovi udruženja ili nadležni organ udruženja utvrđen statutom nadziru rad udruženja. Ako se utvrde nepravilnosti u primjeni statuta udruženja, član udruženja ili nadležni organ dužan je da na to upozori skupštinu. Ako se upozorenje ne razmotri na sjednici skupštine u roku od 30 dana od dana dostavljenog pismenog upozorenja i nepravilnosti ne otklone, može se podnijeti tužba nadležnom sudu, u skladu sa članom 15. stav (3) ovog zakona.

7. Nadležni organi fondacije utvrđeni statutom nadziru rad fondacije. Ako se utvrde nepravilnosti u primjeni statuta fondacije, nadležni organ fondacije dužan je da na to upozori upravni odbor fondacije. Ako se upozorenje ne razmotri na sjednici upravnog odbora u roku od 30 dana od dana dostavljenog pismenog upozorenja i nepravilnosti ne otklone, može se podnijeti tužba nadležnom sudu.

8. Nad radom udruženja i fondacija registrovanih u skladu sa ovim zakonom Upravna inspekcija Ministarstva može sprovesti inspekcijski nadzor, a koji se odnosi na pitanja:

- a) prijavljuje li udruženje ili fondacija izmjene i dopune statuta, ciljeva i djelatnosti, naziva, adrese sjedišta, lica ovlašćenih za zastupanje i prestanak rada udruženja ili fondacije;
- b) koristi li udruženje ili fondacije u pravnom prometu podatke koji nisu upisani u Registar;
- c) koristi li udruženje ili fondacija naziv pod kojim su upisani u Registar;

- d) održavaju li sjednice skupštine udruženja ili upravnog odbora fondacije;
 - e) dostavljaju li udruženja ili fondacije finansijske izvještaje Ministarstvu iz člana 5. stav (5) ovog zakona;
 - f) vode li udruženja spisak članova udruženja na način propisan ovim zakonom, te
 - g) jesu li udruženja ili fondacije prestali djelovati u skladu sa članom 51.a ovog zakona.
9. U postupku sprovođenja inspekcijskog nadzora nad radom udruženja i fondacije inspektor je ovlašćen da preduzme sljedeće mjere:
- a) da naredi otklanjanje utvrđenih nedostataka ili nepravilnosti u određenom roku;
 - b) da izda obavezni prekršajni nalog;
 - c) da obavijesti Državnu agenciju za istrage i zaštitu u slučaju sumnje u krivično djelo pranja novca ili finansiranja terorizma.
10. O preduzetim mjerama iz stava (9) ovog člana inspektor je dužan odmah da obavijesti i registracioni organ, radi upisa zabilješke u Registru.
11. Nadzor nad zakonitošću rada udruženja ili fondacije, koji se odnosi na djelatnost udruženja ili fondacije, vrše organi onog nivoa vlasti koji su nadležni za praćenje stanja u toj djelatnosti, a prema registrovanom sjedištu udruženja ili fondacije.

Član 48

Organi registrovanih udruženja ili fondacije dužni su da upravljaju imovinom udruženja ili fondacije sa dužnom pažnjom i na odgovoran i zakonit način u najboljem interesu udruženja i fondacije.

I.6. PRESTANAK RADA UDRUŽENJA I FONDACIJA-DOBROVOLJNO I PO SILI ZAKONA

Član 49

Udruženje ili fondacija mogu prestati sa radom dobrovoljno ili po sili zakona pod uslovima utvrđenim ovim zakonom.

Član 50

1. Udruženje ili fondacija mogu prestati sa radom dobrovoljno, na osnovu odluke nadležnog organa udruženja ili fondacije.
2. Ako statutom nije drugačije predviđeno, odluka o prestanku sa radom se donosi dvotrećinskom kvalifikovanom većinom glasova članova udruženja ili dvotrećinskom većinom glasova upravnog odbora fondacije.
3. U slučaju dobrovoljnog prestanka rada registrovanog udruženja ili fondacija usvaja plan likvidacije koji je u skladu sa statutom i ovim zakonom.

Član 51

Udruženja i fondacije brišu se iz registra kada rješenje o prestanku rada udruženja odnosno fondacije koje donese Ministarstvo postane konačno ili kada Sud Bosne i Hercegovine donese pravosnažnu presudu o zabrani rada udruženja ili fondacije.

Član 51a

1. Udruženje ili fondacija prestaje da radi ako:
 - a) nadležni organ udruženja odnosno fondacije donese odluku o prestanku rada ili odluku o spajanju i podjeli udruženja odnosno fondacije;
 - b) se utvrdi da je udruženje ili fondacija prestala djelovati.
2. Smatraće se da je udruženje ili fondacija prestalo djelovati kad:
 - a) je proteklo dvostruko više vremena od vremena utvrđenog statutom udruženja ili fondacije za održavanje skupštine udruženja, odnosno upravnog odbora fondacije, a skupština, odnosno upravni odbor nije održan;
 - b) se broj članova udruženja smanji ispod broja tri, a nadležni organ udruženja u roku od tri mjeseca od nastupanja ove okolnosti ne donese odluku o prijemu novih članova udruženja;

c) se broj članova upravnog odbora fondacije smanji ispod broja tri;

d) nije moguće izmijeniti statut fondacije.

3. Lice ovlašteno za zastupanje udruženja ili fondacije dužno je da u roku od 30 dana od dana kada je udruženje ili fondacija prestalo djelovati u skladu sa stavom (2) ovog člana dostavi Ministarstvu zahtjev sa dokazima o prestanku rada udruženja ili fondacije.

4. Kada Ministarstvo utvrdi činjenice iz st. 1. i 2. ovog člana, donosi rješenje o prestanku rada udruženja odnosno fondacije.

Član 51b

1. Udruženju odnosno fondaciji zabraniće se rad ako:

a) djeluje suprotno odredbama člana 5. st. 2. i 3. ovog zakona;

b) nakon prekršajnog kažnjavanja u povratu (član 53. ovog zakona) nastavi da obavlja djelatnosti koje nisu u skladu sa statutarim ciljevima udruženja ili fondacije;

c) nakon prekršajnog kažnjavanja u povratu (član 53. ovog zakona) nastavi da djeluje suprotno odredbama ovog zakona;

d) su ispunjeni uslovi iz člana 30. stav 5. ovog zakona.

2. Postupak za zabranu rada udruženja odnosno fondacije pred Sudom Bosne i Hercegovine pokreću organi nadležni za kontrolu rada udruženja i fondacija.

Član 51c

1. Presudu o zabrani rada udruženja odnosno fondacije donosi Sud Bosne i Hercegovine.

2. Presudom kojom se izriče zabrana rada udruženja odnosno fondacije odrediće se mjere u pogledu imovine, kao i druge neophodne mjere.

3. U postupku o zabrani rada udruženja odnosno fondacije, pokrenutog na osnovu člana 5. stav 2. ovog zakona, shodno se primjenjuju odredbe zakona kojim je uređen krivični postupak.

Član 52

1. Nakon raspuštanja i prestanka sa radom i izmirenja obaveza udruženja ili fondacija, preostalu imovinu i sredstva podijeliće na način utvrđen statutom, drugom registrovanom udruženju ili fondaciji koje ima iste ili slične ciljeve i djelatnosti.

2. *(brisano)*

DRUGI DIO KAZNE NE ODREDBE

Član 53

1. Kaznom u iznosu od 300,00 KM do 3.000,00 KM kazniće se zbog prekršaja udruženje ili fondacija koja:

a) obavlja djelatnosti koje nisu u skladu s ciljevima i djelatnostima udruženja ili fondacije,

b) u pravnom prometu ne upotrebljava naziv pod kojim je upisan u registar,

c) ne prijavi promjene podataka koji se upisuju u registar u roku od 30 dana od dana nastupanja ove promjene,

d) ne upotrijebi višak prihoda nad rashodima ostvarenog obavljanjem privredne djelatnosti na način predviđen zakonom i statutom.

2. Kaznom u iznosu od 100,00 KM do 1.000,00 KM za prekršaj iz stava 1. ovog člana kazniće se i odgovorno lice u udruženju ili fondaciji.

TREĆI DIO PRELAZNE I ZAVRŠNE ODREDBE

Član 54

1. Udruženja i fondacije koji su registrovani prije stupanja na snagu ovog zakona i koje žele da se registruju u skladu sa ovim zakonom, imaju obavezu da usklade svoje akte sa odredbama ovog

zakona i da u roku od šest mjeseci od dana stupanja na snagu ovog zakona dostave nadležnom ministarstvu usklađene akte o registraciji udruženja ili fondacije.

2. Udruženja i fondacije koje se registruju u skladu sa odredbama prethodne tačke nisu obavezni da plaćaju administrativnu taksu.

Član 55

1. Od dana stupanja na snagu ovog zakona svim udruženjima ili fondacijama koji su obavezni da se registruju u skladu sa ovim zakonom, a koji su prethodno započeli ali nisu okončali postupak registrovanja u nadležnosti drugih organa vlasti Bosne i Hercegovine biće dozvoljeno da prestanu sa prethodno započetim postupkom te da umjesto toga nastave sa postupkom u skladu sa odredbama ovog zakona.

2. Udruženjima i fondacijama opisanim u prethodnoj tački biće omogućen povrat taksi koje su platili u postupku registracije provedenom u nadležnosti drugih organa vlasti.

Član 56

1. Pravilnik o načinu vođenja registra udruženja i fondacija Bosne i Hercegovine i stranih međunarodnih udruženja i fondacija i drugih neprofitnih organizacija biće usklađen sa odredbama ovog zakona u roku od 60 dana od dana njegovog stupanja na snagu i biće objavljen u "Službenom glasniku BiH".

2. Pravilnikom će se propisati oblik i sadržaj obrasca registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija, način upisa i vođenja registra, način podnošenja i obrazac zahtjeva za upis promjena u registru, način vođenja zbirke isprava, čuvanja registra, izdavanja izvoda iz registra, kao i druga pitanja značajna za upis i vođenje registra.

Član 56a

1. Ministarstvo je dužno da u roku od 60 dana od dana stupanja na snagu ovog zakona pozove udruženja i fondacije koji su stekli status udruženja ili fondacija od javnog interesa u skladu sa odredbama Zakona o udruženjima i fondacijama Bosne i Hercegovine da usklade svoje akte sa odredbama ovog zakona.

2. Savjet ministara Bosne i Hercegovine će, na prijedlog Ministarstva, u roku od 90 dana od dana stupanja na snagu ovog zakona donijeti podzakonski akt kojim će urediti kriterijume i uslove za izradu i sprovođenje programa i projekata od javnog interesa, koje mogu sprovođiti udruženja i fondacije.

Član 57

Ovaj zakon stupa na snagu osmog dana od dana objavljivanja u "Službenom glasniku BiH" .

Samostalni članovi Zakona o izmjenama i dopunama Zakona o udruženjima i fondacijama Bosne i Hercegovine

("Sl. glasnik BiH", br. 76/2011)

Član 27

Komisija za žalbe koju je imenovao Savjet ministara Bosne i Hercegovine dužna je da okonča sve započete postupke po žalbama podnesenim na prvostepena rješenja Ministarstva, u roku od 60 dana od dana stupanja na snagu ovog zakona.

Član 28

Ovlašćuju se Ustavnopravna komisija Predstavničkog doma i Ustavnopravna komisija Doma naroda Parlamentarne skupštine Bosne i Hercegovine da zajednički utvrde prečišćeni tekst Zakona o udruženjima i fondacijama Bosne i Hercegovine.

Član 29

Ovaj zakon stupa na snagu osmog dana od dana objavljivanja u "Službenom glasniku BiH".

**Samostalni član Zakona o izmjenama i dopunama
Zakona o udruženjima i fondacijama Bosne i Hercegovine**
(*"Sl. glasnik BiH", br. 94/2011*)

Član 26

Ovaj zakon stupa na snagu osmog dana od dana objavljivanja u "Službenom glasniku BiH".